

## Seselwa in ganny 'ASE'

**P**artou kot ou pase ozordi, ou pantann Seselwa pe soufer e pe kriy ayoyo. Dimoun i soke avek sa pri lavi ki'n double. Larzan i fini dan pos, me selman ou pa vreman war kwa ki ou'n aste. Tou dimoun pe soufer, e tou lezour ou antann en diferan taks ki'n ganny enpoze lo sa pep, ki dan son gran mazorite ti kriy byen for pou vot pour Jj, e dir avek lopoziyon kile.

### Tou keksoz pe flote

Depi ki sa mo 'flote' in ranplas sa mo devaliasyon, i resanble ki tou keksoz dan Sesel pe flote. E menm dimoun pe flote, akoz nou pa vreman konnen ki lot sok nou pou tande. Dimoun i nepli konnen ki pou fer. Anplis ki sa, dimoun ki pe travay dan gouvènmant ozordi pa konnen si zot pou annan en lanplwa an Zanbye, oubyen si zot pou ganny pouse. Sa lensertitid ki renye dan pei i soka e sa pa pe fer nou okenn dibyen. Annou pa etonnen si konportman dimoun i vin vreman drol e problemm sosyal i ogmante.

### Plis ki 3000 pou perdi travay

Letan SNP ti dir ki plis ki 3000 dimoun pou perdi zot plas travay, Minis Finans ti sot anler e dir ki sa i pa vre. I ti dir ki selman 1760 dimoun ki pou gammy pouse dan sekter piblik. Me zis en semenn apre, nou'n antann Minis Lasante ek Zafer Sosyal vin anonse ki program 'Carers' in fermen, e ki tou bann 'carers' pou napa lanplwa aparti Zanbye akoz sa 'scheme' pe arete. Total dimoun ki travay koman 'carers' i plis ki 2000. Letan ou azout 2000 avek 1760 eski ou pa ganny plis ki 3000? E annou pa oubliye ki dimoun dan URS osi i sipoze ganny demande pou arete byento. Akoz zot koz manti avek lepep?

### Plis taks ek logmantasyon

Dan sa program reform ou zis tann nouvo taks ek logmantasyon. Paspòr in sorti R500 e vin R750, tiket avyon Praslin in ariv R597, en boutey gas 12kg in ariv R216, en tiket avyon pou al Moris in ariv R5,900 e la nou antann ki lisens driver ek tiket bis pe al ogmante. Eski sanmenm sa meyer fason ki gouvènmant i kapab tret nou bann dimoun? Deza lavi ti deza ser, eski vreman gouvènmant ti napa okenn lezot opsyon pou tret nou bann dimoun ki pe soufer plis? Akoz ki lepep Seselwa i bezwen ranmas lepokase sa 30an donn bal kot bann gran sef dan SPPF ek zot pti group in benefisyè avek tou kalite privez ek lavantaz dan nou pei?

### SNP in fidel avek lepep Seselwa

Ozordi en keksoz pe sorti klerman dan politik isi Sesel: SNP in fidel anver defann lepep Seselwa. Anplis ki sa, nou'n touzour fran e koz laverite avek tou dimoun, tandi ki SPPF in zis fer politik avek bi pour li ganny eleksyon. In profit lo febles nou pep, e promet zot tou kalite keksoz ki zot pa'n akonpli. Ozordi apre ki zot in ganny en manda, Mr. Michel in fou koudpye dan tou promes ki in fer avek nou pep. Dimoun ki ti vot pour SPPF i nepli rekonnèt zot bann dirizan avek sa ki pe arive. Parey sa 'carer' ti dir: 'Apre tou sa lannen kot mo'n sipòrt SPPF e fer kanpanny pour zot, ozordi mon antann mon pouse lo SBC!' SNP i fyer ki nou'n senser avek lepep Seselwa.

## Logmantasyon lapey pa ase

**T**ou dimoun ti atann ek gran pasyans pou ekout diskour sitan enportan ki Mr. Michel ti sipoze fer lo SBC Vanderdi 31 Oktob. Malerezman Mr. Michel pa ti dir nanryen, eksepte ki apre ki in maltret SNP pou fer politik popilis, i ti anons logmantasyon sekirite sosyal pour nou bann vyeyar. Seselwa i dir logmanasyon PA ASE!

Annou regard keksoz byen. To lenflasyon dan pei i depas 30%. Saverdir ki pri lavi in ogmante par sa poursantaz. Si sa i leka, akoz ki gouvènmant i deside donn en logmanasyon ki reprezant selman 13%? Sa i vèdir ki sa logmanasyon lapey pa pou kouver tou sa logmantasyon e tou fanmiy pou bezwey trouv en lot 17% larzan parlao zot lapey pou fer fas avek sa lavi ser. Sa i byen?

SNP i zwenn avek tou travayer Seselwa

pou demande ki gouvènmant i reviz sa logmanasyon e met enpe plis larzan lo tou travayer. Apre tou, si gouvènmant i anvi en lekonomi ki fonksyonnen e ki marse, fodre pa ki i oubliye ki i osi enportan pour dimoun annan larzan pou depanse.

Lo en lot kote, SNP i demande ki travayer dan sekter prive i osi ganny en bon logmanasyon dan zot lapey. Deryen fwa, sekter prive ti dir ki zot pa pou donner e zot lorganizasyon ti sipòrt zot. Avek tou sa bann logmanasyon ek lenflasyon vreman o, nou espere ki sa fwa, zot ava donn sipòrt e pran konsiderasyon pour nou bann dimoun.

Travayer Seselwa i demann plis logmanasyon. Zot pe soufer e sa pti R500 ek R450 pa ase pou kouver zis pri gas ki'n monte. Gouvènmant fodre montre plis konpasyon. Aret mazin zis sirplis, me mazin pep osi.

# Enough is enough!

**D**an son sanson, Allain Ernesta i dir, 'Letan mon dir mon'n fatigue, savedir mon'n ganny ase!' Sa i refren ki laplipar Seselwa pe sante ozordi. Seselwa pe dir avek gouvèrnman 'Enough is enough!' I annan tro bokou taks e nou lavi pe vin en lanfer. Malerezman se sa ki arive letan en pep i sipòrt en gouvèrnman ki anbet li, donn bal, e letan zafer i sal, i sot laba e les bann ki pli malere pou ranmas lepokase. Tipikman SPPF!

Napa kalite keksoz ki pa pe ogmante. E tou sala i rezilta en nouvo taks. Sa ki malonnet dan tou sala se ki Gouvèrnman i blanm tou lo valer roupi e lo zot program pou fer roupi vin konvertib. Me en keksoz ki kler se ki i osi annan serten logmantasyon ki pe vini zis aköz gouvèrnman i anvi ranmas plis larzan.

## Eski bann ki'n byen pase pou rann kont larzan lepep?

**L**epep Seselwa i ankoler letan nou war ki se nou, ki'n ganny servi koman marspeye pandan ki bann gran sef dan SPPF tya pe donn bal avek larzan ek byen leta e lepep pou bezwen pey lepokase. Kestyon ki dimoun pe demande se: Eski sa bann gran sef ki annan tou sa bann larzan deor pou ganny 'investigate' e apre ganny forse pou retourn avek sa larzan isi Sesel?

Nou pe esper avek lenpasyans vi ki se dibyen lepep ki'n ganny abize, e si ozordi nou dan en sitiasyon vreman grav kot serten fanmiy i al dormi vant vid, se gras a sa bann gran sef ki'n manz banann e anvoy lapo avek nou. SNP i dir: 'Fodre rann kont larzan lepep!'

Annou pran par egzamp lisens 'drive'. Esey dir nou ki konvertibilite roupi i annan pou fer dan en tel logmantasyon? Eski gouvèrnman i senpleman anvi ranmas plis larzan?

Nou konpran ki i annan serten keksoz ki lie direktaman avek foreks. E sa i vin aköz pri petrol prensipalman, vi ki nou roupi in devalye. Me selman nou kwar ki gouvèrnman pa devret bat latet Seselwa e profite pou ogmant tou keksoz.

In annan en nouvo taks lo labwason par egzamp. E la aprezan tou dimoun pe espere pou war ki kalite logmantasyon ki Seybrew limenm pou mete lo son prodwi vi ki pri prodiksyon pou osi ogmante. Eski i ti nesese pou gouvèrnman azout sa R3 taks lo labwason? Oubyen eski i zis anvi ranmas plis?

## James Michel fodre demisyonnen

**A**pre ki lepep Seselwa in antann son prezidan Mr. James Alix Michel koze, e apre ki nou'n ganny plis detay lo sa program reform, mazorite dimoun pe dir ki fodre Mr. Michel i retourn devan lepep Seselwa dan en eleksyon.

SPPF pe dir ki se pa sa ki Mr. Michel ti promet. SNP osi pe dir ki Mr. Michel i annan en devwar moral pou retourn kot lepep vi ki i pa'n gard son bann promes eleksyon. I pa kapab fer sa ki i anvi avek sa pep konmsi nou, nou son posesyon personnel. Se lepep ki annan sa swa pou regarde lekel ki i anvi vin son dirizan, spesyalman letan prezidan i komans fer sa ki i anvi san konsilte son pep e gard son promes.

Letan gouvèrnman i ogmant larzan ki en dimoun ki ganny nasyonalitye Seselwa sorti R15,000 pou vin R150,000, eski sa i vreman fer sans? Mazin bann Seselwa ki'n marye avek en etranze, e ki'n fini adopte Sesel koman son pei e i annan en fanmiy. Eski sa bann dimoun pou nobou ganny sa kalite larzan pour zot nobou viv isi avek zot fanmiy? Nou kwar sa i en ekzazerasyon.

Seselwa pe soufer tro bokou deza. Sa bann taks ki gouvèrnman pe mete, pou fer nou lavi vin pli malere. Alor nou SNP, lo lapar lepep Seselwa, nou demande ki gouvèrnman i vin bokou pli responsab e retir taks kot zot kapab tire. Apre tou, en pep i bezwen byen viv dan son pei. Nou pa kapab zis soufer tandi ki gouvèrnman i zwe lakordeon zis aköz in ganny sirplis dan bidze. **Tir sa fardo taks lo nou!**

Mr. Michel pa'n koz laverite avek lepep, e ozordi nou pe ziz li par son aksyon parey i ti dir nou fer an 2004 kan Mr. René ti pas baton avek li. Eski nou kapab vreman dir ki son aksyon i swiv son parol ozordi? Tou dimoun i konnen ki larepons kler se : **NON!**

Si Mr. Michel i en boug kosto, kapab e kopetan ki responsab e montre bokou rezilyans, fodre ki i fer fas avek lepep Seselwa dan bwat vote la ki in dir nou klerman dan ki direksyon i anvi anmenn sa pei.

SNP i 'challenge' Mr. Michel pou retourn kot lepep la ki Seselwa in vreman konnen ki kalite dimoun i ete. Lepep pa kontan sa kalite dirizan ki vol konfyans son zabitan. I pe diriz Sesel lo en manda ki lepep Seselwa pa'n donn li. Alor i bezwen retourn kot lepep.

## PAS PARTOU

### Problem Manman lo erport!

Zafer ti sal letan zofisyè 'customs' ti deside fer manman deklar sa ta boutey anplis ki ti dan son sak. En madanm byen fristre ti premyerman deklare ki i fek sorti vwayaze, alor i fatigue. Sa lerla dan son sak ti ranpli avek boutey delo 'cool easy.' Finalman i ti bezwen rann bat e zofisyè ti sezi 5 boutey anplis! Ki savedir tou sala?

### Ki sa zafer kou deta?

Parol i pi deor. En gran dimoun dan pei pa kontan avek sa program reform. I pe fer tou pou kensel tou

keksoz, me malerezman pour li sa pa pe arive. Tou kalite menas in ganny lanse, e Vandredi 31 Oktob, ti menm annan parol koudeta. Kan eski sa kalite latitud pou sanze? Nepli ler koudeta, me ler dan bwat vote imsyè!

### Rose i riy zonn!

Vreman sa pti madanm pe met tro bokou ki i kapab manze dan son lasyet. Depi ki i mars pli pre avek Mr. Michel, i kwar i en lotorite lo tou keksoz. Malerezman pour li i pa konnen ki zanmen i pou ganny okenn eleksyon dan sa pei e letan i ganny dir sa, Rose i riy zonn!

## FODRE SANZMAN DAN SESEL

**Seselwa, annou ouver nou lizye e regard byen sa ki pe pase otour nou.**

**Nou annan en parti politik, SPPF, ki'n anbet lepep Seselwa e ki'n koz manti avek nou pep e finalman met nou dan sa trou kot nou ete ozordi.**

**Sesel i bezwen sanzman direksyon e sanzman dirizan. SNP i swet tou**

**Seselwa kouraz dan sa moman difisil e demande ki dan lot eleksyon nou tou nou fer en bon swa dirizan.**